

Cheeti da pandaa da Pawlo sa Watesaloniike Gimba guri giyaada

Ya/abimiisay Pawlo naa tlaatleesi kanisaa yaamu gu Tesaloniikege, gwaa yaamu gu didiri gu yaamu gu Make-dooniya guraa bara da gooraa waaree gu hhapee da Yunaani. (Yu'udii kitaabuu gu Yondu gu Ya/abimiisee 17). Da hhe'esi, Wayahuudi wakinay gwaa koisiri oowaraa ina. Teesaaqay, ina gi waaudi ciraai te'esaa. Qariqaaqari iliiaymiisay gosi Timoteeyo yaagi khay daqa dosii haa sugugi ilatlay tuba, hida goó /imbee Kristu Tesaloniikege ilakomaamidiyay /imbaraa Iliitleemu, inay digimati laba'aa'amisi see. Teesaaqay, Pawlo gi handikimi cheetiti sa hii/atlisa muunaï koina haa sa ilaki/isa maamisu gooina.

Cheetitii Pawlo kakaakana /iisoo daqa Iliitleemuge sa /imba haa sla'amuu gu Watesaloniike goó /imbee Yeesu. Slime, ina sigitii slaslaaslay, idoo ina giyaa ilii ibiidi tla/aã gooinay heedi goó sirakomamida gooay Kristu. Da hhe'esi, ina hiti ilakesaasidi tuba, hida goó /imbee Kristu, sliimaa wanay haa Kristu, giyoó ilii kaka/iyee. Slime, ina sigiti ilakesaasidi idoo mala namaa hiica/ada, qatlay Yeesu Kristu gimaa iliiki/iyee. Hiigaasooge ina sigiti ilakesaasidi inay, idoo gi ilii ibiidiyee qatlayka'a naqatloo.

Pawlo cehheemisi Watesaloniike

¹ Cheetiti yaa daqa doyi dahhada ana, Pawlo, sliimaa haa Siila* haa Timoteeyo. Sangu handikiikina unkuray,

* 1:1 1:1 Siila: Siila, yaa kona umaï cada, Silifaano haa Siila. Silifaano, yaa uma gu Kilaatiini. Siila yaa uma gu Eburanaanisoo.

hida gu kanisaa da yaamu gu Tesaloniike, unkuray gu khooslay gu Iliitleemu Taataa goori haa Looimoo gu Goõ Yeesu Kristu. Hhoinay gu didiru haa qasaw ibiidiye sliimaa haa unkuray.

Daareesa haa firoo da Pawlo sa Watesaloniike

² Balalu sliimaa dandiray hoó hadimisana /iisoo daqa Iliitleemuge sa unkuray goõ, haa hoó ilakona hiislaslaw unkuray goõ, firoo doorii pandaa da Iliitleemuge.

³ Dandiray hangoó ilakona hiislaslaw unkuray, goó ilii firiirine Iliitleemu Taataa goori, idoo unkuray goó iliyonditee yondu, hari /imbaraa ga kontee daqa Kristuge. Hoóyi slaslayna, idoo sla'amuu kokuna giyoó iliidahhasiye yondiida yondu hari maguuma. Slime, hoóyi slaslayna hiikaasa dooguna da iliipa'aru daqa Looimoo goori gu Goõ Yeesu Kristu.

⁴ Unkuray ti hhiee da slaiye ha Iliitleemu, ha khuana tuba Iliitleemu dangugii leehhi, ma hida kosi tleehhitiri.

⁵ Qatlay sangwaa ilii kakaani Gimba gu Hhou, yaati hari gimba kilesiiba. Slime, dugwaatii tlaa'asi daqa doogunay hari /uuru gu Muuna gu Iliitleemu tuba, gimbakee guti lou. Unkuray ha khu'uday dandiray, idoó gaa ilii ibiidani sliimaa haa unkuray, sa iliiawaraa dooguna. ⁶ Unkuray hagi sirakontiri ila'aa'aatisa da ibinaa doori, haa hagi ilakeesintiri Looimoo gu Goõ. Unkuray dangwaamati laba'asi see hari khisla, haa oodiri ya/aboo da Iliitleemu, hari hha'aloo da didiri, doó daqa Muuna gu Iliitleemu dahha.

⁷ Teesaaqay, unkuray haã ila'aa'aatisa da hhoi tleehhitiri, sa hida goõ goó /imbee, hhapee da Makedooniyage haa da Akaayage. ⁸ Sa gimba, daqa doogunaa, gimba gu Looimoo gu Goõ duguũ akhamisi, ti Makedooniya haa Akaaya kilesiiba. Slime /imba dooguna ga kontee daqa Iliitleemuge, hingii qoomi daqeemoo sliimaa. Teesaaqay,

dandiray ha konaaba gimba waku ga kaawane daqa hi-keesii. ⁹ Gu lou, inay loi hida gu daqemoo hhakee ilake-saasidiyay, idoo unkuray handaa ilii kwahhasuusidiri. Slime, ilakesaasidiyay idoo gaa ilii maydiri hha'aleemisu iliitleemamee, haagii fookitiri daqa Iliitleemu gu louge haa gu slafa. ¹⁰ Inkoo, ha baqaaqamitayi Nanku Iliitleemu Yeesu khawaraa dosi yadaa rawgo, hikee Iliitleemu giyaa slafisi gwaa'araago. Ina hindoó ilabu'uu'una dandiray hukumuu gu Iliitleemugo gwaa khoca.

2

Pawlo yondu gosi yaamu gu Tesaloniikege

¹ Hhiee koti, unkuray loi ha khu'uday tuba, hhiyuuma doori daqa doogunay yaati diitiray gooba. ² Slime, unkuray ha khu'uday, gaa ilii kahhane dawa daqa doogunay Tesaloniikege, idoo dandaa ilii laba'asi haa dandaa ilii wahaahami yade yaamu gu Filiipige. Teesaaqay see, hari iliawaraa da Iliitleemu goori, dandiray haa kona /atlimaa gu kakaaru sa unkuray Gimba gu Hhou gu Iliitleemu, giyaamati waari see kanimisu gu didiru. ³ Sa gimba, ilii/oo/a doori daqa doogunay, daati afa'afuuma gooba, daati piimaa da tlakwiiba, daati hiicoridu gooba. ⁴ Balalu sliimaa dandiray hoóti kakaana idoo gi iliislaaye gooay Iliitleemu, sa gimba ina hindaa ilatahhi haraay boo/ani, sandigi taatahhi Gimbaki gu Hhou. Dandiray ti piimaa dooriiba da muunaboo/eesa hida, ti sla'ana muuna boo/eesa Iliitleemu, ina goó ilatahhada muunaí koti. ⁵ Kara, unkuray ha khu'uday, Iliitleemu na masaydii goori, dandiray haa khayniiba daqa doogunay hari gimba gu hinankeeriru, baku gimba gu cirihhimaa ma koisani yakwa hhitaa koti, ma slayni idadu daqa doogunaa. ⁶ Dandiray

☆ 2:2 2:2 Yu'udii kitaabuu gu Yondu gu Ya/abimiisee 16:19-24; 17:1-9.

haa dabiidaniiba dumbeesa daqa hidago, gimati daqa doogunaa, baku gimati daqa hida wakinaygo see.

⁷ Dandiray gimati ya/abimiisee da Kristu, haa aloo hi-idahasana hiitlahhasu idadu daqa doogunaa. Teesaaqay see, dandiray haati kaanahasani tla/aã googunay, idoo amaa gooay giyoó ilii ominte ya'ay kosi. ⁸ Gu lou, dandiray hangu sla'ana unkuray hari khisla. Dandiray haa hha'aluumidani, hadisaraa sa unkuray ti Gimba gu Hhou kilesiiba gu Iliitleemu, slime haa hadisani ibinaa doori loi see, sa gimba unkuray hangwaati kaari hari khisla daqa doorii. ⁹ Hhiee koti, unkuray hiislayday maguuma doori haa laba'asu goori yondukii. Dandiray haati yondiidani tleemaa haa amasi, ha ba/atii iliiloayna heedi lensee tla/aã googunay, qatlay sangwaa ilii kakaakane Gimba gu Hhou gu Iliitleemu.

¹⁰ Unkuray loi ti masaydii doori, slime Iliitleemu see ti masaydii tuba, ibinaa doori tla/aã googunay unkuray goó /imbee daati hhoi. Dandiray haa ibiidani tlak-waroo see hhaka, gu koomee ibinaa daa tafa'adi, haa gubasli iliiquru/umoo. ¹¹ Slime unkuray ha khu'uday, idoo dandiray gaa ilii yondiidani sa unkuray gonkokunaa, taqay taataa gooay, idoo giyoó ilii yondiidiye sa ya'ay kosi. ¹² Dandiray hangwaa muuna hii/atlisani, hangwaa tlaatlaqasana haa hangwaa ilakwikwihhani unkuray, ma ibitiri ibinaa doó muunaboo/eesa Iliitleemu. Ina na hika'a goó eteedima unkuray, ma hiiguntiri tawaaloo dosii haa wanqamee dosii da didirige.

¹³ Sa gimbaki, dandiray slime hoó ilakona kakaaru /iisoo daqa Iliitleemuge, sa gimba unkuray gaa ilii oodiri gimba gu Iliitleemu gaa akhasidiri daqa dooraa, hagwaati oodiriiba gimba gu hida pahha. Unkuray hagwaati oodiri, idoo gi iliiwane gooay, ti gimba gu Iliitleemu loi,

goó yondiida slime wa'ay kokunay unkuray goó /im-bee. ¹⁴ Hhiee koti, unkuray haa sirakoomiisee tleehhitiiri gu kanisasuu gu Iliitleemu gu hhapee da Yudaaya, daa ilagaasi daqa Kristu Yeesuge. Unkuray haa slaydiri namati laba'asukira leë, daqa hida kokunaa loa, idoo kanisasuu hhakee gooay digaa ilii laba'asi ha Wayahuudi dene'ee koina. ¹⁵ Wayahuuditee na hhakira gwaa gaasee Looimoo gu Goõ Yeesu, yaa cu/iri tletimiisee da Iliitleemu haa hindigi laba'asiri dandiray see. Inay yoó muuna boo/eesiyaaiba Iliitleemu, kara inay ti fa/ayaa da hida goõ. ¹⁶ Inay yaa koimisiri tlaatlahhamisu dandiray hari maguuma, ma mayni kakaaru Gimba gu Hhou sa hida gu hhapapu wakinay, Iliitleemu ma ilabu'umi inay. Hari amoti, balalu sliimaa inay yoóti ilakonay hiiroogimisu tlakwaroo dooina. Teesaaqay see, hiigaasooge qupidaa gu Iliitleemu yaati ilii khayay inay.

Piimaa da Pawlo da arimaa kara hida gu Tesaloniike

¹⁷ Teesaaqay see, hhiee koti, dandiray dandaa ilii deehhimi haa unkuray, yaati hari qoomay gu coko/u kilesi. Deehhihirukee gwaati slaqoo kilesi, ilahudaa kotii haa sliimaa wana haa unkuray. Dandiray haa ilakoni slawaraa kwayru hari khisla, gu arimaa kara unkuray pandaa haa pandaa. ¹⁸ Teesaaqay, dandiray haa sla'ana khawaraa kara taysi daqa doogunay. Gu lou, asu ana, Pawlo, haa koimisi khakhaw daqa doogunay waa wa/a. Teesaaqay see, Sataanimoo hindigi tlaatlahhasi dandiray. ¹⁹ Inkoo, iliipa'aru goori, hha'aloo doori haa hhamaa goori gurii duuba na mala? Ti unkuray goobaslii pandaa da Looimoo goorii Yeesu, qatlay gimaa iliiki/iye? ²⁰ Gu lou, unkuray na dumbii doori haa hha'aloo doori.

3

Timoteeyo ya/abaraa dosi Tesaloniikege

¹ Hiigaasooge, gaa iliiani hiidahhasanaaba hiikaasa kara deehhirukee haa unkuray, dandiray haati arini, hiti nara'a meetaraa yaamu gu Ateenege dandi kilakoti.

² Teesaaqay, dandiray haagi ya/abani Timoteeyo hhia goorii, slime ti yondimiisay dana'a goori sa Iliitleemu, kakaruge Gimba gu Hhou gu Kristu. Ina hagwaani ya/abani, ma dangu hii/atlisi haa danguma tlaatlaqasi /imbaraa doogunay. ³ Dandiray haa teesaaqay laqani, heedi lensee tla/aã googunay dugu hhantii tla'ameedeesi ha laba'asukee. Unkuray loi ha khu'uday tuba, dandiray kwanda ga hiicatane hari laba'asuki. ⁴ Gu lou, qatlay gaa iliiwane sliimaa haa unkuray, dandiray haa kakaakana sa unkuray tuba, dandiray goõ dandi laba'asi. Inkoo, gim-bakee hiicacaaca/i, idoo ga ilii khu'uudee gooay unkuray.

⁵ Sa gimbaki, ana gaa ilii arimi hiidahhasaaba hiikasa baqamidu, haa ya/abi Timoteeyo daqa doogunay, ma caahhi gimba gu /imbaraa dooguna. Ana haa tla'amuudi ambee, angamalee hari amoo waka hika'a goó koimisa, hiĩ koisi unkuray. Kara yondu goori gaa yondiidani daqa doogunay, gi hhana diitiray.

Gimba gu muuna hii/atlisa daraa khay Timoteeyo

⁶ Inkoo, Timoteeyo yaani khay daqa doorii taysaa daqa doogunaa. Ina sandii kaay dandiray gimba gu hhou gu /imba dooguna haa gu sla'amu kokuna. Slime sandii kaay tuba, balalu sliimaa unkuray handooyi slaslayday dandiray hhoinay. Kara, ha kontay kwayru gu arimaa dandiray, idoo dandiray gooay ga ilii kone kwayru gu arimaa unkuray. ⁷ Teesaaqay, hhiee koti, dandiray dandii tlaatlaqasi ha gimba gu /imba dooguna, ilahufiduge haa laba'asu goorii goõ. ⁸ Gu lou, dandiray haã arini hha'aloo

da ibinaa, sa gimba unkuray haã qadimitiri nara'a, ila-gaasage haa Looimoo gu Goõ. ⁹ Inkoo, dandiray hi-idahhasa kaawa /iisoo daqa Iliitleemuge sa unkuray, sa ilaki/isaraa da hha'aloo wa/a ga kone pandaa da Ili-itleemu goorii sa unkuray. ¹⁰ Tleemaa haa amasi dandiray hoó ilakona firoo Iliitleemu hari maguuma, ma sandi qay mucu, gu arimaa unkuray kara pandaa haa pandaa, may roogisani idoo daa slakuti /imbaraa doogunay.

¹¹ Inkoo, firiirina Iliitleemu ina loi, Taataa goori haa Looimoo goori Yeesu, sandi laqane amoo sa dandiray, maa khayni daqa doogunay. ¹² Kara, Looimoo gu Goõ hiiro-gisiye sa unkuray sla'amuu wa/a, mangi sla'aasla'adiri unkuray haa unkuray haa hida goõ. Dandiray gooay slime, idoo hangu iliisla'ane unkuray. ¹³ Ina hii/atlisiye muunaiĩ kokuna, ma ilakontiri ibinaa tlinti'isage, ilawaasa see hhaka pandaa da Iliitleemu Taataa goori, qatlay Looimoo gu Goõ Yeesu gimaa iliiki/iye, sliimaa haa hida goõ gu Iliitleemu.

4

Ibinaa doó muunaboo/eesa Iliitleemu

¹ Unkuray hangwaa caacaahhamisidiri daqa dooraa, idoo dangu iliislaiye ibinaa, ma muunaboo/eesidiri Ili-itleemu. Gu lou, teesaaqay hagani ilii ibimaamitay. Hiiigaasooge hhiee koti, hangu firina haa hangu tlaat-laqasana unkuray, hari uma gu Looimoo gu Goõ Yeesu tuba, ilakooma yondu teesaaqay hari khisla. ² Sa gimba, unkuray ha khu'uday, ti ilakaawa mala sangwaa hadisani unkuray, daqa Looimoo gu Gongo Yeesu.

³ Iliitleemu hiti slai unkuray ma ibitiri ibinaa dabasli tlakwaroo, ma hii/ipidiri sumuku slipalauuma. ⁴ Kila heedi tla/aã googunay caahhiye, idoo gi ilii warii qa-didiye slaqwa dosi ina loi, ibinaa dabaslige tlakwaroo

haa da kooma muree. ⁵ Hhantii geemayday slaqoo kokuna, digima tawaalimi ha slahhaahhaau gu tlaku gu slipalauuma, hida gu hhapapu pahha gu hhidimee Iliitleemu. ⁶ Kara gimbakiige, heedi hhanti dakusi daqa hhia gosii, haa gu hhanti hiicori. Sa gimba Looimoo gu Goõ, /agitina gimbakii gonge, idoo sangwaa ilii kaawani haa hangugi ilii/oo/ani unkuray hari /uuru. ⁷ Sa gimba, Iliitleemu hinda eeteediiba ma ibiidani ibinaa da slasla/iima. Ina hindaati eeteedi, ma ibiidani ibinaa dabasli tlakwaroo. ⁸ Teesaaqay, heedi gu sisia caacaahhamisuki, hiti sisaasi'iyaaba heedi. Ina hiti sisaasi'i Iliitleemu, goó hadisa sa unkuray Muuna gosi.

⁹ Inkoo, gimba gu sla'amuu hhiee goó iliipa'amee, ti kwanda gooba ana sanguti handikima kara unkuray. Sa gimba, unkuray loi dangwaa caacaahhamisi ha Iliitleemu, idoo hangu ilii sla'aasla'adee unkuray haa unkuray. ¹⁰ Gu lou, unkuray hoó sla'aday hhiee goó, gu waaree daqeemoo goó gu hhapee da Makedooniya. Slime, dandiray hangu tlaatlaqasana unkuray hhiee koti, ilakooma sla'amuu inay hari khisla.

¹¹ Kara, maguumida ibinaa ibidinaa da kaanahhasa. Kila heedi ilii qaasiye gimba gosi haa yondiidiye yondu hari dabiĩ kosi, dandiray gooay idoo hangwaa ilii ilakaawani unkuray. ¹² Teesaaqay laqa, hari ibinaa dooguna da hhoi da balalu sliimaa. Hari amotee, unkuray ha slayday muree pandaa da hida hhaka'ay gu kahhee /imba Kristu. Te'esii, unkuray ha iliipa'antaaiba kara ilii'aw ha hida wakinay.

Looimoo gu Goõ ki/araa dosi

¹³ Inkoo hhiee koti, dandiray sla'anaaba unkuray ma dakusidiri caahha gimba gu hhakira gwaa kaka/ee. Unkuray hhanti li/iday hida wakinay pahha, gubasli iliipa'aru gu slafaraa. ¹⁴ Dandiray hoó /imbana tuba, Yeesu yaa

gwaai, Iliitleemu gwaagi slafisi, slime Iliitleemu harimaa khay sliimaa haa Yeesu, hhakira goõ gwaa kaka/ee, gwaa /imbee ina. ¹⁵ Dandiray sanguti kakaakana unkuray gimbaki giyaa kaay Looimoo gu Goõ tuba, dandiray gu kahhee slafana, gumaa meetee, qatlay Looimoo gu Goõ gimaa iliiki/iye, gu lou, hagimaa ba/anaaba hhakira gwaa kaka/ee. ¹⁶ Sa gimba, Looimoo gu Goõ ina loi, maa hii/eeti yadaa rawaa gu rawgo, yaagi ilafahhi hari afoo da didiri, afoo da malayika gu didiru daga akhasi haa afoo da paranda gu Iliitleemu daga akhasi. Te'esii hhakira gwaa kaka/ee gwaa /imbee Kristu, diginimaa slafisi gesaa. ¹⁷ Da hhe'esi, dandiray gu kahhee slafana, gumaa meetee, dandimaa dafidi sliimaa haa inay tlongage, ma amood-abaawani Looimoo gu Goõ rawge. Teesaaqay, hamaa ibiidana sliimaa haa Looimoo gu Goõ koraraa haa koraraa goõba hiifaakoo. ¹⁸ Inkoo, hangu ilakontee tlaatlaqamisu unkuray haa unkuray hari gimbaki.

5

Hangu ilakhuukhu'usidee sa khawaraa da Looimoo gu Goõ

¹ Inkoo, hhiee koi, kwanda gooba dandiray sanguma handikini unkuray gimba gu qatlaai haa gu diqimi. ² Sa gimba, unkuray loi ha khu'uday nara'a tuba, baloo da khawaraa Looimoo gu Goõ, maati khayda fiisiisay pahha, idoo giyoó ilii khaye hari amasi. ³ Qatlay hida gimaa ilii kakaanee tuba, “Inkoo, da wana qasaw haa hhoinay khoodoo,” te'esii hhamisaraa ginaa asu ilii khayda inay ciraai, taqay slahhaa'amee da hiidawaraa gooay, idoo giyoó ilii khayee hadee da kooma hubay. Gu lou, inay maay dahhasiyaaiiba hii/ipa hhamisatee da didiri.

⁴ Teesaaqay see, unkuray hhiee koti hhanteege wantaaiiba, balotee hingumaa ilii khaydaaba fiisiisay pahha.

⁵ Unkuray goõ ti ya'ay gu cencee haa ti ya'ay gu tlemaa.

Dandiray ti ya'ay gu hhantee gooba, kara ti ya'ay gu amasi gooba. ⁶ Teesaaqay, inkoo dandiray hhanti guana, hida wakinay gooay giyoó iliiguiyee. Ba/ay dandiray ha diliqanee haa hangu ga/aynee nara'a. ⁷ Sa gimba, hida goó guee haroó amasi guiyay, kara hida goó ooniimidee haroó amasi ooniimidiyay. ⁸ Inkoo, sa gimba dandiray ti ya'ay gu tleemaa hangu ga/ayne nara'a. Dandiray oowanee /imba haa sla'amu ubee, imbagoo pahha muunainge, haa iliipa'aru goori gu ilabu'uru ubee, kofiyaa da sikhima pahha. ⁹ Sa gimba, Iliitleemu hindaay leehhiiba dandiray, ma dandi hhamisi hari qupidaa kosi. Ina hindaatii leehhi, ma slayni ilabu'uru hari amoo da Looimoo goori gu Goõ Yeesu Kristu. ¹⁰ Ina naa gwaai sa dandiray, ma ibiidani sliimaa haa ina, qatlay gimaa iliiki/iye, ga ilii slafane baku gaã ilii kaka/ani see. ¹¹ Teesaaqay, hangi ilakontee tlaatlaqamisu, haa hangii /atlimisidee unkuray haa unkuray, idoo goó iliiyonditee gooay inkoo.

Pawlo ilakaawa dosi da hiifaakoo

¹² Inkoo hhiee koti, dandiray hangu firina unkuray, muriida hhakee goó wariiqadimidee haa goó ilii/oo/imee unkuray daqa Looimoo gu Gonge. ¹³ Kara, inay muriidak-ina hari khisla haa sla'akina, sa gimba gu yondu gooina, giyoó yondiidiyee tla/aã googunay. Ibiida hari qasaw unkuray haa unkuray.

¹⁴ Slime hhiee koti, dandiray hangu tlaatlaqasana unkuray, ilii/oo/aw hida gwaa naa/amuumuudee. Muuna hii/atlisaw hhiee hhakee gwaa tla'amuumuudee. Kara, iliiawaw hhakee gu kahhee hii/atla iliipa'aruuge, haa hangu iliikaasidee haa hida goõ. ¹⁵ Khu'uma nara'a, heedi lensee hhanti bui tlakwaroo hari tlakwaroo daqa dana'a gosii. Ba/ay balalu sliimaa hiti yondiida hhoiinay unkuray haa unkuray, haa sa hida goõ.

¹⁶ Balalu sliimaa unkuray hha'aluumida. ¹⁷ Balalu sliimaa ilakooma firoo Iliitleemu. ¹⁸ Gimba sliimaage unkuray hadisa /iisoo sa Iliitleemu. Sa gimba hikee na gimba Iliitleemu gi slaiye, magu yonditiri ilagaasa doogunay daqa Kristu Yeesuge. ¹⁹ Hhanti hhamisiday aslaa da Muuna gu Iliitleemu. ²⁰ Hhanti qooqitay ya/aboo da tletiru, goó daqa Iliitleemu dahha. ²¹ Teesaaqay see, unkuray ilatahha gimba sliimaa. Oowa gimba sliimaa gu hhou. ²² Unkuray hangu deehhintee haa tlakwaroo goó.

²³ Inkoo, Iliitleemu ina loi sandoó hadisa qasaw, il-abuusliye unkuray sumuku. Ina ga/aye muunaii kokuna, ilahudaa kokuna haa slaqoo kokuna, ma maydiri yondu tlakwaroo balota'a naqatloo gimaa iliiki/iye Looimoo goori gu Goó Yeesu Kristu. ²⁴ Iliitleemu goó eteedima unkuray, yondiidi gimbakee, sa gimba ina guti lou.

²⁵ Hhiee koti, slime dandiray see sandi firintee. ²⁶ Cehheemisa hhiee goó gu taysi waaree hari sla'amuu gu Iliitleemu.* ²⁷ Ana hangu ilakaawa unkuray hari uma gu Looimoo gu Goó ambee, cheetiti daga somine pandaa da hhiee gonge. ²⁸ Hhoinay gu didiru gu Looimoo goori gu Goó Yeesu Kristu ibiidiye sliimaa haa unkuray goó.

* 5:26 5:26 hari sla'amuu gu Iliitleemu: Hari Yunaanaisoo ti cehheemisu hari amoo da humba'ada doóba tlakwaroo.

Ila/imbidu Gu /abu hari Burungaisoo

Burunge: Ila/imbidu Gu /abu hari Burungaisoo (Bible)

copyright © 2019 Wycliffe Bible Translators, Inc.

Language: Burunge

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 14 Jun 2022 from source files dated 28 May 2022

5fd9f69c-03b6-5343-85b8-5043bec70185